

12 JUL 1996

PERKONGSIAN BIJAK HUBUNGAN ROLLS-ROYCE DAN MALAYSIA AIRLINES

Oleh: Tan Hock Guan

SINGAPURA, 12 Julai (Bernama) -- Perkongsian bijak, satu pendekatan yang unik kepada persekitaran perniagaan yang berubah-ubah, bergerak selangkah lagi pada akhir bulan ini dengan pengerusi Rolls-Royce PLC Sir Ralph Robins dan pengerusi Penerbangan Malaysia (MAS) Tan Sri Tajudin Ramli mempengerusikan bersama Dialog Antarabangsa Langkawi Kedua (LID '96).

Agenda yang mencabar telah ditetapkan dan, dengan lebih daripada 200 wakil termasuk lima orang ketua kerajaan, tidak akan ada kekurangan inisiatif dan inovasi, kata Sir Ralph di dalam satu kenyataan yang dikeluarkan di sini hari ini.

LID Pertama telah diadakan tahun lalu oleh Commonwealth Partnership for Technology Management (CPTM) dan Kumpulan Industri-Kerajaan Malaysia bagi Teknologi Tinggi (MIGHT).

Kira-kira 150 pemimpin perniagaan dan kerajaan menghadiri acara anjuran sektor swasta itu tahun lalu, dilancarkan oleh Perdana Menteri Malaysia Datuk Seri Dr Mahathir Mohamad, yang melihat perhubungan perniagaan dengan negara-negara sedang membangun berasaskan prinsip Perkongsian Bijak.

Dialog tahun ini akan meneruskan tema itu tetapi peranan kerajaan dan sumbangan teknologi akan ditekankan.

Rolls-Royce adalah pengasas CPTM.

MAS awal tahun ini memilih enjin Trent Rolls-Royce untuk kumpulan pesawat barunya Boeing 777. Pemilihan itu juga mengekalkan rekod kejayaan 100 peratus Rolls-Royce ke atas Boeing 777 di Asia Tenggara.

Sir Ralph berkata perhubungan Rolls-Royce-MAS adalah "lebih daripada urusan niaga."

Ia merupakan kesinambungan perhubungan berasaskan Perkongsian Bijak bagi Rolls-Royce dengan Malaysia di mana Rolls-Royce juga adalah cergas di dalam penjana tenaga, transmisi dan pengagihan dan juga industri-industri minyak dan gas di dalam usaha-usaha yang memberi faedah kepada kedua-dua Rolls-Royce dan rakan kongsi Malaysiannya, tambah beliau. -- BERNAMA

THG OS/sia